

D. D.

20

Dissertatio Academica,

*Explicatura Quæstionem:
An Vitia Quædam Dentur, Civitati
Utilia?*

Cujus

Partem Priorem,

Conf. Ampl. Fac. Philos. in Reg. Acad. Aboënsi,

Præside

*Mag. JOHANNE BILMARK,
Histor. ac Phil. Pract. Professore Reg. & Ordin.*

Publico examini modeste submittit

*HENRICUS VEGELIUS J. F.
Ostrobothniensis,*

In Audit. Majori die XX. Dec. MDCCCLXXXVIII.

H. A. M. C.

ABOÆ

Typis FRENCKELLIANIS.

VIRO

Admodum Reverendo atque Praeclarissimo,
D:n. Mag. JOHANNI VEGELIO,
Ecclesiae, quae Deo in Kemi Träsk colligitur, Pastor ac Præ-
posito meritissimo,

PATRI CARISSIMO,

Specimen Academicum meorum in stadio litterarum progres-
sum editurus, deberem utique Tuam, Pater Carissime, in
me recte instituendo prædicare curam ac diligentiam; operi
autem manum admovens satis animadverto, farcinam istam
meis non convenientem humeris. Te tamen, Pater Carissime,
per paternam Tuam rogo bonitatem, digneris in pignus filia-
lis pietatis benigne excipere hoc munusculum, Tua forte ex-
spectatione, meo certe officio inferius. Quam si dederis veniam,
ego vicissim Summum Numen adsiduis defatigabo precibus,
velit Tibi, Pater Carissime, longam vegetamque concedere
ætatem, ut nos, quorum salus a Tua admodum pendet salu-
te, exoptato Tuo diutissime fruamur præsidio. Sic ex intimo
vovet pectore

PATRIS CARISSIMI

filius obedientissimus
HENRICUS VEGELIUS.



PRÆFATIO.

Sicut magna omnino est naturalis ingeniorum humana-
rum disparitas, quam insuper adaugent tempera-
menta, institutio, præjudicia & seculi etjam genius;
ita docet quoque experientia, quod in diversas artes ac
disciplinas singuli sere homines propendeant, nec eun-
dem in harum cultura obseruent tenorem. Meditatio-
nibus enim suis nonnulli hunc ponunt scopum, ut ar-
gumentum, quod sibi sumserunt elucubrandum, in
succum, uti dicitur, & sanguinem convertant, illudque
aliis planum adeo & perspicuum reddant, ut ejus veri-
tatem atque utilitatem Davus quoque adsequatur;
dum alii contra suo ingenio futurum dedecori putant,
nisi sua eruditionis specimina ad apicem demonstratio-
num, concatenatarum quidem, sed in nimiam saepe mo-
lem exporrectarum, ostendant; satis habentes, si
unus vel alter in æthera suarum speculationum adscen-
dere valeat. Illi necessitatibus ac commodis aliorum
suos attemperant labores; hi autem in stadio litterarum

A

ado-

adoreas tantum sibi solis comparare nituntur. Et ad horum classem pertinent quoque illi, qui paradoxas depereunt opiniones, has censentes maxime aptas, admirationi Lectorum sibi conciliandæ. Hoc animi morbo multos eruditos inde ab eo tempore, quo Sophisista in pretio sunt habita, fuisse infectos, Historia satis docet litteraria. Sic CARNEADES, uti perhibent Scriptores, non minorem consecutus est auditorum applausum, dum injustitiam publice laudaret, quam dum paulo ante justitiæ necessitatem ac præstantiam exposuisset. Superiori imprimis seculo haud infrequentem fuisse Eruditorum consuetudinem reperimus, ut de plerisque quæstionibus in utramque partem, & adfirmando & negando, copiose differerent, non perpendicularentes, hanc docendi rationem medium esse, Scepticismum postliminio introducendi, & homines, ad veritatis cognitionem a se deducendos, confundendi. Tolerari uteunque potuit ista philosophandi licentia, quæstionibus mere speculativis in medium propositis, summopere vero improbanda, si ad moralium certitudinem dubiam reddendam adhibeatur. Fuerunt nihil tamen minus, existimantes, quædam dari vitia, civitati non prorsus inutilia, quorum opinionem ad breve revocare examen in præsenti constituimus opella; flices nos judicaturi, si convenienti rationum lixivio fuerum, quo vitia perverse incrustantur, detergere possumus.

Per *virtutem* intelligimus actionem humanam, legibus Divinis ad amissim convenientem; ad quam proinde requiritur, ut intentio agentis, media & occasio agendi atque effectus actionis præceptis legum jam memoratarum consentanea sint. Contra ea autem *vitium* est actio quælibet humana, quæ a legum cynosura vel penitus vel quo ad partem deflecit: quod quidem si ejus fuerit pravitatis ac gravitatis, ut securitas per illud turbetur publica, adeoque censuram ac poenam mereatur civilem, crimen nuncupatur. De illis, quibus coercendis civitas fere est impar, non vero de his sermonem impræsentiarum instituemus. Quocirca statim observamus, quod sicut nox incipit, ubi deficit dies; ita quoque virtutes ac vitia tenui non raro discriminè ponantur; cuius quidem rei hanc opinamur esse causam, quod de moralitate actionum non ex solo earundem actu physico, sed ex circumstantiarum cum illis connexarum bonitate vel pravitate sit judicandum, & quod unius harum *ἀλεξία* faciat, ut actio, quantumvis speciosa illa videatur, vitiorum tamen classi sit inferenda. Hinc quum accuratum actionum examen instituerre multi intermittent, non raro evenit, ut in moralitate ejusdem actionis definienda in sententiarum divortia abeant, atque imperitum vulgus ab æquis rerum aestimatoribus plurimum dissentiat. Loquitur quoque experientia, non paucos longa exercitatione hoc fuisse consecutos,

ut majorem vitiorum vim ita subigant, ut familiaria illa, quæ e gremio suo excutere aut negligunt aut non habent, non erumpant, nisi occasio, locus & tempus ad moneant, ista licentia de ipsorum dignitate & existimatione, quas farras tectasque impense volunt, nihil plane decidere; qui proinde satis habent, si tales aliis obveniant, quales videri volunt. Denique id *civitati utile* dicimus, quod ex sua indole verum ejus *commodum* promovet, & quo proinde ea fine suo carere nequit detrimento, distinguendum igitur ab eo, quod per casum aliquando expediat.

§. II.

Multorum hæc fuit consuetudo, ut, quum operosum nimis censerent, singulas actionis eujusvis circumstantias expendere, de ejusdem indole ex ea, qua potissimum valebat parte, imprimis ex eventu, quamvis hic intentioni agentis non raro esset contrarius, judicarent. Hi non satis perpendere videntur, quam admirandus sit Dei ad actiones humanas concursus, & quam multum sapientissima ejus consilia a nostris differant moliminiibus, scilicet, ut canit Poëta: *Ludit in humanis Divina potentia rebus.* Nec considerant, quod, docente experientia, non raro contingat, eum ut negotia, quæ prudentissime ordinata putabantur, exitum & auctori & aliis perniciosum habuerint, tum ut temeraria & ab omni infecituræ felicitatis præsumtione aliena

liena facta occasionem præbuerint insignia consequenda commoda. Quis præterea, quæso, ignorat, quod inimici interdum juvent, aut quod exitiosæ eorum machinationes, in perniciem innocentum directæ, his non nunquam fuerint adminicula ex pulvere in solem prodeundi, atque ex miseria ad commodam perveniendi vitam. Sic ex Historia constat sacra, quod filii Patriarchæ Jacobi acerrimum in fratrem Josephum conceperint odium, tantum quod somnia quædam sua, quæ futuram ejus dignitatem indicare videbantur, illis narrasset, adeo ut eum, nullo fangvinis aut innocentiae habito respectu, e medio tollendum decernerent; quod etjam perfecissent parricidium, nisi Divina Providentia eum ex faucibus mortis eripuisse, scenamque ita mutasset, ut quem in paterna domo fratres sui ferre non posse, eum ut familiæ suæ, ad incitas ferme redactæ, sospitatorem in peregrino supplices venerari necesse haberent solo; quod quomodo factum esset, ipse modesta hac exponit reprehensione; *vos cogitastis malum contra me, sed Deus convertit illud in bonum Gen. L. 22.* En! ingentem intentionis atque eventus disparitatem. Et quoniam exempla his gemina passim in Historia occurunt, suffragandum erit Poëtæ canenti - - *Careat successibus opto - - Quisquis ab eventu facta notanda putat (a).*

(a) Vid. Ovidii Heroid., Epistol. II. v. 25, 26.

Sunt nonnulli, ceu supra a nobis fuit indicatum, qui ut ingenii sui acumen ostendant, contendere non dubitant, quædam dari vitia civitati utilia, horum nomine, cum alia facta, tum imprimis ambitionem, avaritiam, voluptates, ac luxum comprehendentes. Videamus igitur, quo specioso habitu naturalem singulorum deformitatem obvelare aut saltem a proborum oculis avertere nituntur, & primum dicamus, quo modo caussam ambitionis agant. Scilicet noto notius est, tam quod intellectus noster per naturam densis ignorantiae nebulis sit involutus, quam quod voluntas prævis trahatur inclinationibus, insurgentibus præsertim contra rationem affectibus; quos animæ morbos quamvis justa imminuat disciplina, contra eosdem tamen remedium non minus efficax habent ambitionem; quæ velut flabro dissipat nebulas, horizonti microcosmi incumbentes, ægritudinem voluntatis corrigit & affectus in ordinem redigit. Quamprimum enim animum incessit vehemens super alios eminendi cupido, homo omnes ingenii nervos intendit, ut majores maioresque in litteris faciat progressus, considerans, non quos vincat, sed a quibus vincatur. Quicquid aggreditur, idem perficere non intermittit, impedimenta suæ alacritati objecta, totidem ad progrediendum incitamenta reputans; & si de gradu quandoque dejiciatur, mox tamen se erigit, scenamque, ut meditatum obtineat scopum,

alio

alio tantum modo instruit. Tempori inservire, occasiones dextre captare, vela in ventos apte obliquare, caute, ubi expediat, simulare ac dissimulare, opinioni aliorum se accommodare, haud dubitat ambitiosus. Quamvis autem propter virtutes intellectuales præcipue inclarescere studeat, non tamen exercitium moralium, in quo demum cunque fuerit statu, prorsus intermittit. Si pater atque herus fuerit, domum suam ita instruere nititur, ut splendorem ei conciliet, atque ut inter præcipuos ejus loci nominetur. Quum autem hæc vitæ ratio sumtus haud mediocres postulet, nulli parcit industriæ, qua suos, quantum fieri possit, augeat redditus. Imprimis autem in patriæ commodum conferre putatur symbolam ambitiosus: studet enim justitiæ, quam novit virtutem esse, aliorum benevolentiaæ ac favori sibi conciliando aptissimam. Opibus vel a majoribus sibi relictis, vel sua comparatis industria minime parcit; miseris stipem, scientiarum & artium cultoribus præmia distribuit, imprimis curans, ut superiores, quorum patrocinia & auctoritas in honoribus procurandis valent, in suo sint ære. Quos autem, propter multitudinem, beneficiis sibi devincire non potest, votis autem suis provehendis aptos judicat, hos benevolentia, humanitate & quibusvis aliis officiorum generibus sibi conciliare studet, nihil infra suam censens dignitatem, dum ex candidatorum est numero, modo ad desideratos aditum sibi paret honorum gradus. Quæ diximus, abunde comprobare ipsis videtur Historia.

Quot-

Quotne egregia atque utilia debemus ambitioni? Aut quis ignorat, quod multi difficillimas suscepereint peregrinationes, ut propter hujus vel illius disciplinæ culturam inter proceres reipublicæ litterariæ ab aliis carentur. Quare tropæa Miltiadis Themistocli somnum excutiebant? nisi quod animum ejus vellicabat par inclarescendi desiderium. Imo multos Heroum, qui patriam suam ferme ad incitas redactam servarunt, ambitione potissimum fuisse ductos, sine hoc stimulo nihil ausos, satis pro comperto habent ambitionis defensores.

§. IV.

Quantum roboris insit ratiociniis pro ambitione jam allatis, expensi, simulque logomachiam in isthoc præcisuri argumento, genuinam ambitionis indolem paucis explicare conabimur. Ambitio itaque, juxta communem loquendi usum, est immodicum studium honores sibi comparandi. Unde statim apparet, eam esse filiam perversæ philautiæ, qua sit, ut ambitiosus se sui ipsius idolum constituat, curas nocte dieque in id intendens, ut talis non tam sit, quam potius videatur, qualem desiderant cives sui, ad excelsam sortem peruenturum. Bono itaque apparenti inhiat, munerum splendorem præferens tranquillitati ac commoditati, in mediocri conditione facilius obtainendis. Tanta autem honorum cupiditate flagrat, ut mediorum ad illos perveniendi indolem parum curet, enormia etjam facta, si modo

* * * *

modo deformitatem horum obvelare queat, sibi non raro permittens. Si conscientia ad vitæ tenorem, ab æquitate & probitate alienum, murmuraret, hanc conticescere jubet, in honoris culmine aliquando emendaturus, quiequid iniqui in arduo gloriæ tramite commiserit. Gravissimum itaque vitium est ambitio, cui per se titulus honesti non competit; a qua probe distinguendum naturale atque innocuum laudis studium; quo homines lætantur, quod aliis probetur opera, quam facultatibus animæ excolendis atque officiis præstandis impendunt; non quod ista laus sit finis, sed gratus laborum fructus ab eis susceptorum. Nec ambitionis cohorti erit adscribendus, qui sine ullo proprii lucri aut commodi respectu ad honores ideo enititur, ut ampliorem civibus suis inserviendi occasionem habeat, qui proinde consumi non detrectat, modo profit.

§. V.

Quum probam hominum institutionem ad felicitatem publicam multum conferre, omnis ævi doceat experientia; civitati pessime consulunt, quotquot succrescentem juventutem motivo ambitionis & spe insignium honorum aliquando obtainendorum ad sedulam litterarum culturam solent excitare. Fac enim, concitatem hac ratione adolescentiam alacriori studio majorique animi impetu ad scopum contendere & ad comparanda sibi eruditionis præsidia ferri; immotus tamen

manet Canon moralis: quod non sint facienda mala, ut inde eveniant bona. Evidem non omne laudis ac gloriæ studium litterarum alumnis erit interdicendum, caute tamen de eodem incauta admonenda erit juvenus, ut sentiat, illas esse naturales diligentiae adhibitæ pedisequas. Qui autem ambitione inflati litteras collunt, has non propter earum præstantiam, aut quod adminicula sint meliorem vitæ conditionem obtinendi, sed propter finem, a vera felicitate alienum, amant. Nec ab his exspectandum, ut insignes faciant progressus, quum Musarum consortio non eam, quæ decet, inferant mentem. Scilicet ad solidam rerum cognitionem adspirantes, in legendō & meditando multam adhibebunt attentionem; proinde tranquillo erunt animo, sed qualia menti halcyonia non concedit ambitio, semper irrequieta & de honorum augmentis continuo sollicita. Quare ambitiosi desultoria ratione in stadio litterarum versantur, non multum sed multa, non solida sed curiosa & elegantia legentes, atque his muniti præsidiis dictaturam in re publica litteraria sibi adserentes. Si indolem animi ipsorum spectemus, sunt suffeni, tam ad concipiendum in alios, præsertim æmulos, offensionem molles, quam ad eam deponendam duriores. Huic perversæ instituendi methodo originem præcipue debet illa paradoxarum opinionum farrago, illaque in argumentis placitis defendendis pervicacia, qua sit, ut si vel millies suorum convincantur errorum, prius tamen cælum rueret, uti proverbio dicitur, quam

hi latum unguem a sua discederent sententia. Immō
dum hi, qui eruditionis nectar vappa ambitionis cor-
ruperunt, meritis ad honorum culmen, quod fastuosæ
eorum imaginationi obversatur, enī non possunt, fa-
mam eruditionis vel astute eblandiuntur, vel malis et-
jam artibus nominis amplitudinem sibi anquirunt, tri-
tum illud secuti: *aude aliquid brevibus gyaris & carcere*
dignum - - Si vis esse aliquid (a). Ex quibus con-
cludere licet, homines ita institutos aptiores esse ci-
vitati turbandæ, quam juvandæ.

§. VI.

Religioni etjam tanto magis officit animus, am-
bitionis cœstro percitus, quanto certius constat, indo-
lem harum esse plane contrariam. Quæ igitur nos do-
cet Historia, Ecclesiam Dei adversitatum procellis sæ-
pius fuisse jaētatam, juxta ostendit, præcipuos turbu-
rum auctores fuisse homines, supra alias auctoritate
eminere gestientes. Alii horum quum salutis æternæ
viam, in Scriptura Sacra hominibus propositam, ni-
mis planam censerent, in hoc negotio summam Dei bo-
nitatem non agnoscētes, veræ Religionis purpuræ
varias suarum meditationum lacinias adsuere non du-
bitarunt; quasi suo indignum esset ingenio, supra vulgus

B 2

in

(a) Vid. *JUVENALIS Satyr. I. v. 73, 74.*

in doctrina de œconomia salutis non sapere. Alii ut
 suo nihil impervium putarunt acumini, adyta myste-
 riorum, quæ Deus suæ foli reservavit sapientiæ, rese-
 rare tentarunt, ceu falsum atque impossibile rejicientes,
 cuius indolem ratione sua non possent adsequi. Hinc
 progerminarunt indifferentismus religionum, Deis-
 mus, Libertinismus, Naturalismus, Atheismus, am-
 bitiosi ingenii humani portenta, tam bonis moribus,
 quam religioni revelatæ inimica. Ex ambitionis quo-
 que turbido fonte repetenda sunt acerrima odia, quæ
 Sacrorum ministri, antiquiori præfertim ævo, in eos
 conceperunt, quos in dogmatibus fidei a se dissentire
 animadverterent, caussam Dei se egisse existimantes,
 si auctores, quos errorum convincere non potuissent,
 graviter oppressissent. Et quis, quæso, ignorat, quod
 Cleri Pontificalis, qui philanthropicam Religionis
 Christianæ indolem fuisset oblitus, ambitioni tribuenda
 fuit tot bella, religionis prætextu per orbem olim gesta,
 & tot innocentum, sacra sibi ignota, recipere nolen-
 tium, cædes, quot in Historia memorantur, & quibus
 utrisque genus humanum gravissime fuit adfictum?
 Scilicet tantum potuit, non religio, sed ambitio sua-
 dere malorum.

§. VII.

Quantum porro familiis noceat ambitio, paucis
 dispiciamus. Docet autem experientia, quod quam-
pri-

primum animum Patrisfamilias ambitio occupavit, hic mox sui dissimilis evadat, omniaque, quæ ipsi pri-
dem perplacuerunt, scil. vitæ genus, studia, societates a-
liaque ei deinceps fordeant. Pleraque officia, quæ ipsi
nt conjugi, ut patri & hero incumbunt, oblitiseitur ac
negligit, suæ in familiam incuriæ hanc prætexens caus-
fam, quod multitudine negotiorum obruat; subin-
nuens tamen, se, votorum compotem, levem hanc ja-
éturam amplissime reparaturum. Domum suan sic
instruit, ut potentiores eam invisere non dedignantur,
horumque patrociniū obtinendi causa, totum, si
quod habet, patrimonium liberaliter concequit, vano
illi homini non dissimilis, qui ingentes impendit pecunia-
rum summas, ut in legatorum concessu aliquando dice-
re posset: *Le Roi, mon Maitre.* Sic autem bona sua
dilapidans, sibi suæque familiæ adeo parum consulit,
ut ex commoda, qua gaudebat, forte ad splendidam
redigatur miseriam, præsertim quum plura saepe face-
re cogatur nomina, quam quibus expungendis vel sua
vel liberorum ætas sufficiat. Esto autem, quod desidera-
tum honoris culmen ascendat, nimis tamen cito ex-
peritur, se nubem pro Junone fuisse amplexum, nec si-
ne indignatione animadvertisit, præfenti quidem sibi
venerationem exhiberi, absentem autem contemni ab
eis, quotquot norunt, quibus artibus munerum præro-
gatiyas sibi procuravit.

Latius autem adhuc serpit ambitionis malum, nec
 veremur adferere, eam esse pestem civitatis maxime
 capitalem; quod oppido patet, si modo perpendamus,
 quomodo se gerere soleat ambitiosus. Colere quidem
 videtur virtutes, ut nominis ac meritorum famam con-
 sequatur, eas tamen ipso exercitio corrumpit. Offi-
 ciosum se exhibet, non dignis & in spem patriæ natis,
 sed eis potissimum, ex quorum studio votorum suorum
 sibi pollicetur successum. Suam quoque jactitat libe-
 ralitatem, immo dissipat non tantum suas, si quas possi-
 det, opes, sed quas insuper mutuo sumere potest pe-
 cuniarum summas, & quidem, uti præ se fert, in glori-
 am suæ gentis ac patriæ commodum, quæ autem ha-
 mata sunt beneficia; siquidem tam beneficiariis, quam
 creditoribus suis necessitatem imponit, suis suffragiis
 ad ampliora & laetiora se promovendi munera, illis
 quidem spe majora in posterum a se obtinendi dona,
 his autem metu jacturam bonorum suorum faciendi,
 nisi desideratam obtineat provinciam, alioquin æri sol-
 vendo impar futurus. Luculentum hujus exemplum
 præbet Julius Cæsar, qui versuta hac liberalitate,
 quamvis juvenis adhuc esset, Pontificatum maximum
 Q. Catulo, Senatus Romani principi, præripuit.
 Præcipue justitiæ famam captat; re autem ipsa illam
 vel cauponatur, vel ejus specie tegit molimina, in pa-
 triæ exitium tendentia, quæ suo premit pectore; ad
 imita-

imitationem ambitiosi Absalonis, qui privatam ideo
tantum dignari videbatur conditionem, ut amplior-
rem haberet occasionem, justitiam inter cives admini-
strandi, in eo interim totus occupatus, ut, populo in
seditionem concitato, patrem de regali dejiceret folio.
Si autem hæc & alia virtutum simulacra ostentando,
in honorum semita tantum, quantum velit, non profi-
ciat, vitia quævis, civitati funestissima, in suum vocare
subsidium nullus dubitat. Simultates inter optimates
alit, eas in suum dextre convertens commodum: ob-
trectationibus non parcit, sed eisdam in æmulis oppri-
mendis scite utitur, in pectore gerens illud Julii Cæ-
saeis effatum; *Si violandum est jus, regnandi gratia*
violandum, aliis rebus pietatem colas. Et ut paucis
multa complectar: Quis Historiæ aliquantum peritus
ignorat, ex ambitione enatas esse dissensiones,
contentiones, internecina inter sanguinis & amicitiae
vinculo junctos odia, & factiones, quæ partim in pro-
scriptiones optimorum civium, partim in seditionum
incendia eruperunt; ambitiosis quibusdam nullam
potius rempublicam, quam ex suo non administra-
tam arbitrio, discupientibus. Addo denique, ab am-
bitiosis distinguendos esse eos, qui pro litteris & pa-
tria

tria gravissima adire pericula non detrectant, siquidem hi finem egregiis factis propositum habeant, non proprium honorem, sed scientiarum incrementa & patriæ, in angustiis constitutæ, salutem.

